

KONTROL MOZIOA

DEMOKRAZIA ZUZENeko EREDU PROPIOA DELA ETA

Axier Jaka Goikoetxea EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2016ko maiatzaren 16ean, Pertsonen Batzordean aztertutako interpelazioaren ondorioa da.

JUSTIFIKAZIOA

2015eko maiatzean argitaratu zen Gipuzkoako Aldizkari Ofizialean Donostiako Hiritar Kontsulten Erregelamendua, hirian demokrazian eta herritarren ahalduztze politikoan sakontzeko xedea zuena. Nabarmenezkoa da Demokrazia Zuzenaren araudia Donostian herritarrek egin duten lehen araudia dela eta talde politiko guztiek aho-batez onartu zutela Udalbatzaren 2015eko apirilaren 30eko osoko bilkuran.

Izan ere, 2013ko urrian, Miramar Jauregian burutu ziren Tokiko Demokrazia Zuzenaren Jardunaldietan, hainbat erakunde publikok eta unibertsitate, kolegio profesional, auzo elkarte, herri-eragile, enpresa, komunikabide, gaztetxe, alderdi politiko, udal-langile eta norbanako askok parte hartu zuten eta Donostiako Udalari mandatu garbi bat luzatu zioten: Donostian demokrazia zuzeneko eredu propioa eraikitzea.

Hori dela eta, 2014an, prozesu parte-hartzaile luze bat egin zen Miramarren bertan berrogei herritar ingururekin eta, prozesu horren ondotik, 2007ko Partaidetza Arau Organikoaren aldaketa eta 2015eko Hiritar Kontsulten Erregelamenduaren onarpenak etorri ziren aho-batez Udalbatzan. Hiru hilabetetara, ordea, Carlos Urquijoren aginduz, Estatuko Abokatzak araudia errekurritu zuen, 2016ko apirilaren 25ean, baliogabetua izan dena.

EH Bilduren ustez, udal autonomiaren eta donostiarren eskubideen aurkako eraso larria egin du Espainiar Estatuak, aho-batez Udalbatzan onartutako araudi batez eta donostiarren adierazpen eta iritzi-eskubidearen urratze larriaz ari baikara. Alta, indarrean den zezenketen inguruko hiritar kontsulta zalantzan jar dezake. Horregatik, ezinbestekotzat jo genuen sententzia errekurritzea eta Udalak Donostiako demokrazia-ereduaren eta herritarren iritzi-eskubidearen defentsa egitea, zezenketen kontsulta egiteaz gain, etorkizunean egingo diren gainontzeko kontsultak ere ahalbidetzeko. Ataka honetan, maiatzaren 5eko Bozerramaileen Batzordean eta jendaurrean ondoko eskaerak luzatu genituen EH Bildutik:

- 1.- Udalak epaia errekurritzea.
- 2.- Zezenketen kontsulta gauzatzea.
- 3.- Gizarte Kontseilua deitzea.
- 4.- Herritarrentzako eta eragileentzako batzar ireki bat deitzea, espresuki, zezenketei buruzko kontsultaren sustatzaileak ere gonbidatuz.

Astebetera, maiatzaren 12ko Bozeramaile Batzordean, sententzia errekurritzea erabaki zen aho batez eta alkateak berak, aurretiazko posizioa zuzenduta, erregelamendua errekurritu eta zezenketen kontsulta aurten egitea xede, legezko bide guztiak agortzeko konpromisoa hartu zuen.

Erabakiok begi-onez ikusten ditugun arren (eta hala adierazi genuen publikoki), kezkarri deritzegu batzordearen ondoren alkateak egin zituen adierazpenei; izan ere, zezenketen kontsulta egiteko Espainiako Ministroen Kabineteari baimena eskatuko zitzaiola argitaratu baitzen, Estatuak baimena emango digun inongo bermerik eduki gabe (Usurbilgo kasuan ikusi dugun bezala). Adierazpen hauek argitzeko asmoz, alkateari interpelazioa zuzendu genion, baina ez genuen bere erantzuna jasotzeko aukerarik izan. Are gehiago, Partaidetzako ordezkariak erantzun zuen Udal Gobernuak agindua emana diela zerbitzu juridikoei Estatuaren herri-galdeketak gauzatzeko erregelamendua garatzeko, Toki-araubidearen 71. artikulua araberara.

Harritzen gaitu Estatuko galdeketen erregelamendua egiteko agindua eman izanak eta, ustez, Espainiar Gobernuari baimena eskatzeko hautua adierazi izanak, udal autonomia eta donostiarrek partaidetza prozesuan erabakitako eredia errespetatzen dituzten bestelako legebideak daudenean: oraindik ere epai irmoz baliogabetu ez den Donostiako Hiritar Kontsuluten Erregelamendua eta onartu berri den Udal-legeak 82. artikuluan jasotzen duen hiritar kontsuluten aukera. Hain zuzen, Demokrazia Zuzenaren printzipioetako bat kontsultak egiteko baimenik eskatzea ez denean. Are gutxiago Udalaren araudia errekurritu duenari.

Demokrazia Zuzeneko eredia definitzeko prozesu parte-hartzaileko kide askok, *Donostia Antitaurina Orain* Plataformak, Donostiako *Gure esku dago*-k, hamar bat auzo elkartek eta 1.100 herritar baino gehiagok sinaduraz hori bera eskatu dute: donostiarrek erabakitzeko eskubidea dutela eta hiritar kontsultak defendatzea. Horregatik guztiagatik, EH Bildu taldeak alkateari eta Udal-gobernuari luzatzen die ondoko

KONTROL MOZIOA:

- 1.- Udalbatzak hertsatuki eskatzen dio Alkateari herritar eta herri-eragileekin eraikitako Donostiako Demokrazia Zuzeneko eredia defenda eta sustatu dezala.
- 2.- Udalbatzak hertsatuki eskatzen dio udal gobernuari Estatuko Abokatutzaren errekurtsuaren ondotik sortutako egoera eta aterabideak, kontsuluten sustatzaileekin, erregelamenduaren partaidetza prozesuko kideekin, zein Gizarte Kontseiluarekin konpartitu ditzala.
- 3.- Donostiako Demokrazia Zuzeneko eredia defenditu eta sustatzeko bidean, Udalbatzak hertsatuki eskatzen dio udal gobernuari, herritar- eta udal-autonomiaren ideia-pean, lehenetsi ditzala inongo baimenik eskatu behar ez diren legebideak.

EH Bildu talde politikoa
Grupo político EH Bildu

Ijentea, 1 - Tel. 943481027 - www.donostia.eus -
20003 Donostia

Donostian, 2016ko maiatzaren 20^a.

Axier Jaka Goikoetxea
EH Bildu udal taldeko zinegotzia